

L'Aisciuda Ladina perpea

Enc e istituzions se à metù ensema per endrezèr na scomenzadiva outa a slarièr fora l lengaz, la cultura e l sentiment ladin

Fascia envers l'Aisciuda Ladina. L'é chest l titol cernù per la gran manifestazion che l Comprenjorie Ladin de Fascia, l'Union di Ladins, la Scola de Fascia e l'Istitut Cultural Ladin endreza la pruma setemèna de mé, più avisa dai 3 ai 7 de mé.

Se trata de na scomenzadiva outa a duta la comunanza de Fascia per valorisèr e slarièr fora l lengaz e la cultura ladina, te duta sia desvaliva formes.

N moment de reflescion per recordèr noscia storia, per se vardèr endò, ma tel medemo temp ence per troèr neva forzes per jir inant, stolc de fèr pèrt de chesta realtà, senza reserves e pedimenc, ma con gaissa e enteress.

L'é stat pissà de meter a jir chesta festa via per i prumes del meis de mé ence per ge dèr luster e recordèr n moment de gran emportanza dal pont de veduda storich e simbolich: ai 5 de mé del 1920 l'é nasciù la bandiera ladina dai trei colores: l vert, l bianch e l brun.

L'é stat apontin enlouta, subito dò la Gran Vera, te n moment zis rie e pesoch per noscia jent, che passa 70 raprezentanc de la valèdes ladines i se à binà sun Frea per meter jù n document unitèr out a tegnir ensema e a mantegnir na sort de unità e de leam anter noscia comunanzas: l'emportant l'era poder stèr adum con n lengaz,

na cultura e na identità de duc.

La bandiera ladina sarà la protagonista de la festa de l'Aisciuda Ladina. "N simbol fort che pel identifichèr la partegnuda al teritorie, a la comunanza e a la cultura ladina – à dit l president de l'Union di Ladins Silvano Ploner – e cree che sie benfat che la vegne metuda fora sun barcon te la festes o ti momenc emportanc leé a noscia comunanza."

Per chest l'Union di Ladins ge sporjarà a ogne capo familia sozio na bandiera grana 100x150 cm da poder tachèr fora sun fenestra o barcon, ensema a n picol codejel co la dates e l calandèr de la maor festes, metù ensema da Riccardo Zanoner.

L'argoment vif de chesta scomenzadiva sarà l lengaz, l lengaz de la mère, che ne partegn desche mendranza ladina, l lengaz da durèr te duta la ocajions publiches e ence private.

Per chest l'é stat pissà a na "maratona de letura" olache ogneun pel dèr sie contribut se metan a la leta per portèr dant ogne sort de letures. La maratona de letura pearà via en domenia entorn les 6 da sera e la jirà inant ence l lunesc. Duc é envié de cher a tor pèrt con sciantif sentiment ladin: per se scriver ite a la maratona de letura ge vel se oujer a l'Ofize Linguistich del Comprenjorie Ladin.

La manifestazion "Aisciuda

Ladina" se verjarà ofizialmenter en domenia ai 3 de mé da les 3 domesdì te tendon de la manifestazions de Poza con n concert de la Mùsega.

Enlouta vegnarà portà dant ence dut l program che roda dintornvia la festa, che perveit momenc de teater, prejentazion de video e libres, programes spezièi a la radio e ativitèdes te la scola.

Apontin la scola sarà gran protagonista de chesta scomenzadiva: vegnarà portà dant conzerc, scomenzadives e concorsc sul tem "mia tera, mie lengaz", e te la scolines per duta la setemèna vegnarà rejonà demò per ladin. (mci)